

ԵՐԶԱՆԻԿ ԳԵԻՈՐԳԵԱՆ
ՍՈՒՍԱՆՆԱ ԳԵԻՈՐԳԵԱՆ

ՄԱԿԴԻՐՆԵՐԸ ԳԱՐԵԳԻՆ ՆԺԴԵՀԻ ՍՏԵՂԾԱԳՈՐԾՈՒԹԻՒՆՆԵՐՈՒՄ

Գարեգին Նժդեհի պատկերաւոր մտածողութեան դրսեւորումներից մէկը գեղարուեստական մակդիրներն են, որոնցով նա բնութագրում է մարդուն, կեանքի այս կամ այն երեսոյթը, բնութիւնը: Հեղինակն, անշուշտ, օգտագործել է ժողովրդական մտածողութեան, այսպէս կոչուած, կայուն մակդիրները՝ իրենց մակդիրակիրների հետ, ինչպիսիք են՝ *սար դարդ, ծով ցաւ*, ապա նաեւ՝ համընդհանուր ճանաչում ստացած, այլեւայլ հեղինակների կողմից մշտապէս գործածուող մակդիրներ՝ մակդիրակիրների հետ՝ *խենթ քամի, բոցավառ շրթունքներ, առիւծածին մայրեր* եւ ուրիշներ: Սակայն մեր բառաքաղած մակդիրների մեծագոյն մասը Նժդեհի ներշնչանքի, մտքի արգասիքներն են, որոնց վրայ հիմնականում կժանրաւանդ:

Լեզուական առումով քննուող մակդիրներն արտայայտում են մէկական բառով եւ անհամեմատ սակաւ՝ բառակապակցութիւններով: Վերջիններից կարելի է յիշատակել (մակդիրները մշտապէս ներկայացւում են մակդիրակիրների հետ). *Արարատեան արեւով օծուն ճակատ, հոգեպէս քանդուած էակ, հոգով արծիւ հայ, ճշմարտութեամբ օծուն գրիչ* եւ այլն. «... ջերմ համբոյր ... մեծ վշտակրին (Ա. Ահարոնեանին), որի **Արարատեան արեւով օծուն ճակատը** այնքան սիրով հանճարի ձեռքը շօշափեց»¹, «Նա, իբր **հոգեպէս քանդուած էակ**՝ նաեւ պատրասպաշտ է» (Հ. էջ 197), «Յեղակրօնը ... **հոգով արծիւ հայն** է, որ թեւահարում է վերստին ... դէպի հայոց պատմութեան կատարները» (Հ. էջ 243-244), «Տեսնել ու հասկանալ կ'սկսին ... շարժուիլ կ'սկսին **ճշմարտութեամբ օծուն գրիչներ**» (Հ. էջ 88):

Հանդիպում են համեմատութիւններ, որոնք ծառայում են իբրեւ մակդիրներ. *ծովի պէս յուզւած ջահել, արեւի պէս տաք գիւղել*. «Գուցէի իմ ստուերն է յուզել ծովի կապուտաչեայ աղջիկներին ... - մտածեց **ծովի պէս յուզւած ջահելը**»², «... կռուով փախցրեց երագին տեսած **արեւի պէս տաք** էն արեւ **Գիւղելին**» (ԳԵ. էջ 87):

1 Գ. Նժդեհ, Հատընտիր, Ամարաս հրատ, Երեւան, 2006, էջ 151: Սոյն գրքի վերաբերեալ յղումները կտրուեն շարադրանքում (Հ. էջ):

2 Գ. Նժդեհ, Գրական երկեր, Նախիջեան հրատ., 2003, էջ 86: Այսույետեւ սոյն գրքի յետագայ յղումները՝ շարադրանքում (ԳԵ. էջ):

Մակդիրների մեծագոյն մասն արտայայտուած է մէկական բառով, ինչը եւ ընդհանրապէս աւելի տարածուած է գրականութեան մէջ: Ահա այդպիսիներից հինգը. *ալեւոր իմաստութիւն, անարեւ ծերութիւն, դժոխաստիպ բանտ, կարմիր վրէժ, հաւերժաշունչ ոգի*. «Ինչ որ Աստուածն է, այն էլ իր երկրպագուներն են», - ասել է Արեւելքի *ալեւոր իմաստութիւնը* (Հ. էջ 498), «... կայ մի բան, որ թունաւորում է ... սարսափեցնում՝ **անարեւ ծերութեան** ու մահուան ուրուականներով» (Հ. էջ 93), «... ժողովուրդների երեւակայութիւնն ահաբեկող **դժոխաստիպ բանտերն** ու զնդանները, ...» (Հ. էջ 414-415), «Ես **կարմիր վրէժով** բռնուած կ'ուզեմ հարայ տալ... - էլ գիտի նամարդ աշխարհ...» (ԳԵ. էջ 10), «Պատմական անձը քարեղէն արձան, քարացած էութիւն չէ, այլ՝ **յաւերժաշունչ ոգի**» (Հ. էջ 359):

Խօսքիմասային առումով, սովորաբար, այսպէս է նաեւ ներկայ պարագային, մակդիրներն արտայայտում են ածականներով, ինչպիսիք էին վերը բերուած մէկական բառով արտայայտուածները: Այդպիսիք այլ առիթներով կլինեն նաեւ յետագայ շարադրանքում: Նժդեհի ստեղծագործութիւններում նոյնպէս կան գոյականով կամ դերբայներով արտայայտուած մակդիրներ: Գոյականական են՝ *աղամանի գեղեցկութիւն, բարտի հասակ, բոց շուրթեր, գայլ հարեւաններ, արծիւ ռազմիկ*. «Ո՛վ կը կոտրէ սիրոյ գրիչն **գեղեցկութեան աղամանը...**»³, «...**բարտի հասակս** աւիշի էր կարօտ...» (ԳՐԵ. էջ 121), «...**բոց շրթներէլ** փերթ առ փերթ, Թափէ ժպիտդ աչքերուս մէջ...» (ԳՐԵ. էջ 120), «...այսօր կը չարախնդան իր **գայլ հարեւաններէն** թուրքն ու թաթարը» (Հ. էջ 448), «...նա սիրում էր, էն հպարտ **արծիւ ռազմիկը...**» (Հ. էջ 413): Դերբայներից, ինքնըստինքեան, գործածուած են հարակատարն ու ենթակայականը՝ *գերեզմանացած Թրքահայաստան, շարարուած թուլութիւն, խաչուած արդարութիւն*, ապա նաեւ՝ *ժպտացող յոյս, խայթող թերթ, հառաչող ազգեր*. «Թշնամին հսկում է ոչ միայն **գերեզմանացած Թրքահայաստանի**, այլեւ Խորհրդային Հայաստանի խաղաղութեան վրայ» (Հ. էջ 57), «...նուաստութիւն – ասել է **շպարուած թուլութիւն...**» (Հ. էջ 138), «Էականը դա դաւադրուած Նժդեհը չէ, **խաչուած արդարութիւնը...**»⁴: Եւ ապա. «Այո, երեխան ... խոստումնալից կարելիութիւն է, մի **ժպտացող յոյս**՝ լաւագոյն ապագայի» (Հ. էջ 252), «...**շուկայիկ յիշոցներ**, ... գրախօսութիւն, – ահա մեր «**խայթող**» **թերթերի** հրապարակախօսութիւնը» (Հ. էջ 33), «**Հառաչող ազգերը**՝ ստրուկ, ... միշտ էլ դիմել են յեղափոխութեան» (Հ. էջ 84):

Քննուող մակդիրների մեծագոյն մասը փոխաբերական բնոյթի է, իսկ անհամեմատ փոքր մասը՝ ուղղակի իմաստ ունեցող: Վերջիններից են՝ *գինեւնային հայրենասիրութիւն, հայրենակրօն մայրեր, ոգելից երիտա-*

3 Գ. Նժդեհ, Գրական երկեր, Երեւան, 2012, էջ 119: Սոյն գրքի վերաբերեալ յղումները՝ շարադրանքում (ԳՐԵ. էջ):

4 «Ազգ», 12.02.2011 (Գ. Նժդեհի մի նամակից): Սոյն թերթի յղումները կտրուեն շարադրանքում Ազգ:

սարդություն, քաղաքականապես մուրացիկ ժողովուրդ, զոհաժոժար հայրենասիրություն, որոնք բանաստեղծական են իրովի. «Գինետնային հայրենասիրությունը ... այնքան էլ հեռու չէ անհայրենասիրությունից» (Հ. էջ 117), «Ինչպիսի՜ աստուածային հաճոյք մարտնչողի համար՝ լսել խրախուսիչ ձայնը հայրենակրօն մօր: Մայր անունը պիտ դառնայ ... սրբազան մենաշնորհը հայրենակրօն մայրերի» (Հ. էջ 123-124), «Դեպ մեզ է գալիս մեր ոգելից երիտասարդությունը» (Հ. էջ 169), «Տկար, քաղաքականապես մուրացիկ ... ժողովուրդը» (Հ. էջ 133), «Հայաստանը պետք ունի հանապազօրեայ եւ զոհաժոժար հայրենասիրություն» (Հ. էջ 602):

Փոխաբերական իմաստ ունեցող մակդիրները դիտարկելիս հարկ է ուշադրություն դարձնել յետեւեալ ոճական հնարների վրայ, որոնցով արտայայտուածները առաւել շատ են:

Շնչաւորում եւ անձնաւորում: Բնութեան երեւոյթներին, առարկաներին վերագրում են կենդանիների կամ մարդու յատկութիւններ: Մարդկանց ծայր աղքատութեան մէջ պահող կարիքը բնորոշում է՝ իբրեւ **բռնակալ**, գլգացող առուակը՝ **լալկան**, (համապատասխանեցնելով նկարագրուող իրավիճակին), մեղմ զեփիւռը՝ **հեզ**, վերջալոյսը՝ **տխուր**, գիշերային կիսախաւարով պատուած դաշտերը՝ **քնաթաթախ**. «... հազար հազարներին սեւ ցաւն է ընկերանում, բռնակալ կարիքը նեղում ...» (Հ. էջ 412), «Նա սիրում էր մորմոքը **լալկան առակի ...**» (Հ. էջ 413), «Իմ սէ՛րը – դա շունչն է **հեզ զեփիւռի**» (ԳԵ. էջ 45), «Ահ, նա (Հրանտը) սիրում էր եւ **վերջալոյսը տխուր ...** » (Հ. էջ 413), «... եկայ պատմելու, թէ ինչպէս էին **քնաթաթախ դաշտերում**՝ միացի ես...» (ԳԵ. էջ 34):

Քանակով շատ աւելին են այն մակդիրների ու մակդիրակիրների կապակցութիւնները, որոնցում բնութեան երեւոյթների կամ առարկաների յատկութիւնները վերագրում են մարդուն: Այս կերպ բուռն ու ջերմ սէրը հեղինակը բնորոշում է՝ իբրեւ **արեւոտ**, բուռն զգացմունքներ արտայայտող շրթունքները՝ **բոցավառ**, ջարդարար հարեւան ժողովուրդներին՝ **գիշատիչ**, գոհունակութիւն արտայայտող ժպիտը՝ **լուսափայլ**, բուռն ու ջերմագին կարօտը՝ **հրեղէն**, յաղթական խիզախ առաջնորդին՝ **շանթանման**. «Ճապոնացու **արեւոտ սիրով** սիրի՜ր հայրենիք...» (Հ. էջ 418), «Այս խօսքերը շնչացին Առծիւ Լաթոյի **բոցաւառ շրթունքները...**» (Հ. էջ 416), «...դա ասել է՝ հեշտացնել մեր **գիշատիչ հարեւանների** գործը...» (Հ. էջ 34), «...բաւականութեան **լուսափայլ ժպիտը** երեսիդ...» (Հ. էջ 412), «... օրուայ հայութեան միջոցով ... **հրեղէն կարօտով** եւ կամքով իր հին փառքերը կը փնտռէ» (Հ. էջ 174), «Այո, ... նման գրքերին է յաջողում ժողովրդէն **շանթանման առաջնորդներ** ու մահապատրաստ վիտիազներ քանել» (Հ. էջ 595):

Մի երրորդ ոճական հնարով բնութեան մի երեւոյթի, առարկայի յատկութիւնը վերագրում է դարձեալ բնութեան մէկ ուրիշ երեւոյթի, առարկայի. եթէ համեմատութիւններով արտայայտւենք, **զեփիւռը** հաճելի է ու մարմնին

դուրեկան, ինչպես *թալիշը, այբուրենը*՝ սրբազան ու գեղեցիկ՝ ասես *լուսեղեն, աստղերը՝ ոսկու պես շողացող*. «... *լուսեղեն այբուրեն ... մեզ տուել է Տարօնը*» (Հ. էջ 525), «Ահ, նա սիրում էր եւ երգն անխօս *ոսկեշող աստղերի...*» (Հ. էջ 413):

Մակդիրների կիրառությունը: Գարեգին ՆՓՂԵՏԻ երկերում տեղ գտած մակդիրների ցանկը քննելիս աչքի է զարնում յետեւեալ հանգամանքը: Նա առանձնակի հակում ունի դէպի որոշակի բառեր ու արմատներ եւ դրանցով է կազմում իր մակդիրների մեծ մասը: Այդ բառերն ու արմատները բնորոշում են նրա իսկ էությանը, ներդաշնակվում նրա իսկ իղձերին ու նպատակներին, արտայայտում նրա սիրելի կամ գարշողական վերաբերմունքը դէպի ինչ-ինչ առարկաներ, երեւոյթներ, մարդիկ՝ ներշնչելով նրան ստեղծելու իր խօսուն մակդիրները: Ահա այս կերպ առանձնանում են՝ *Աստուած, արեւ, բոց, հայ, լոյս, հուր, շանթ, ոսկի* բառերը եւ դրանցով կազմուած բարդութիւնները: Դրական բնորոշումների պարագային. *աստուածաշունչ, աստուածազարդ արեւադէմ, արեւոտ, բոցավառ, բոցեղեն, բոցաշունչ, լուսադաւան, լուսափայլ, լուսեղեն, հրաշունչ, հրեղեն, հրաքերան, շանթանման, շանթընկեց, շանթող, ոսկեղեն*: Բացասական բնորոշումների դէպքում՝ *հայասարան, հայակեր, հրատանջ, մահաշունչ, գայլ, գիշատիչ, թղթէ, շնացեղ*: Շատ այլ մակդիրների շարքում ահա սրանց վրայ է սեւեռում ընթերցողի ուշադրութիւնը: Ճիշտ նոյն կերպ աչքի են զարնում մեծ թուով որոշակի մակդիրակիրներ, որոնք հանդիպում են նկատելիօրէն յաճախ՝ կապուած հեղինակի որդեգրած գաղափարների, ապա նաեւ այն հասարակական երեւոյթների, խնդիրների, մարդկային ներաշխարհի, հասարակական միջավայրի հետ, որոնց լուսաբանում կամ նկարագրում է նա: Առանձին-առանձին կանգ առնենք ՆՓՂԵՏԻ նախասիրած այն թեմաների վրայ, որոնց նուիրում երկերում գոհարների պէս սփռուած են առաւել յաճախ գործածուած մակդիրների ու մակդիրակիրների կապակցութիւնները՝ առիթը ներկայանալիս անդրադառնալով նիւթի հետ ներդաշնակող այլեւայլ մակդիրների նոյնպէս:

ա. Հայրենասիրություն: Այս կէտում ընթերցողը ՆՓՂԵՏԻ հետ միատեղ ապրում է բանաստեղծական շնչով արտայայտուած նրա նուիրական զգացմունքները դէպի հայրենի երկիրը, ազգը, ամենաընդհանուր ընդգրկմամբ՝ ցեղը եւ նրա մշակոյթը. «ամիւծաբնակ երկրամաս» (Հ. էջ 659), «արեւադէմ ժողովուրդ» (Հ. էջ 594), «երկաթէ ժողովուրդ» (Հ. էջ 450), «լուսեղեն այբուրեն» (Հ. էջ 525), «հոգով արծիւ հայ» (Հ. էջ 243), «հոգով արծիւ ժողովուրդ» (Հ. էջ 442), իսկ դէպի այդ երկիրը բնակեցրած ու բնակեցնող հայերը, մայրերը, որդիները՝ «ամիւծածին մայրեր» (Հ. էջ 125), «աստուածաշունչ նահատակ» (Հ. էջ 78), «աստուածաշունչ որդի» (Հ. էջ 546), «լուսադաւան նախահայրեր» (Հ. էջ 354), «հայրենակրօն մայրեր» (Հ. էջ 123), «հրաշունչ Մամիկոնեան» (Հ.

էջ 382), «հրաշունչ Վարդաններ» (Հ. էջ 550): Ընթերցողը նոյնպիսի վիշտ է ապրում հեղինակի հետ՝ իր տառապաշատ ժողովուրդի համար ու դառնում ատելավատ դէպի այդ վիշտը պատճառողները. «գայլ հարեւան» (Հ. էջ 448), «գայլ ցեղ» (Հ. էջ 78), «գերեզմանացած Թրքահայաստան» (Հ. էջ 57), «գիշատիչ հարեւաններ» (Հ. էջ 34), «հառաչող ազգ» (Հ. էջ 84), «հրատանջ Ազգ»^{5*} (Հ. էջ 435), «որբացած երկիր» (Հ. էջ 416): Սակայն Նժդեհը ոգեպնդում է իր ժողովրդին, ոտքի հանում՝ դէպի յառնում. «բոցեղէն հայրենաբաղձութիւն» (Հ. էջ 468), «դիւցազնաշունչ ցեղական» (Հ. էջ 533), «հրաշունչ ցեղայնութիւն» (Հ. էջ 488), «ոգելից երիտասարդութիւն» (Հ. էջ 169), «շանթանման հերոսներ» (Հ. էջ 146), «վրիժավատ հայորդի» (Հ. էջ 417):

բ. Կռիւ ու պայքար: Բոլորի պարտականութիւնն է հայրենիքի պաշտպան դառնալ՝ ճակատելով թշնամիների դէմ, ըստ որում՝ միշտ պատրաստ լինելով նահատակուելու նրա համար, հոգեպէս գերազանցութիւն ունենալ նուաճողների նկատմամբ, դրանով իսկ յաղթական լինել ռազմադաշտերում: Արծարծելով այս գաղափարը՝ Նժդեհը դիմում է ռազմաշունչ մակդիրների՝ հայրենի պաշտպաններին վերագրելով գերիզօր ոյժ ու խիզախութիւն: Ովքեր են նրանք ու ինչպիսին են նրանք: Ահա՛. «աստուածաշունչ դիւցազն» (ԳԵ. էջ 67), «աստուածաշունչ Հսկայ» (Հ. էջ 410), «աստուածաշունչ նահատակ» (Հ. էջ 78), «արծիւ ռազմիկ» (Հ. էջ 413), «հրաշունչ զինուոր» (Հ. էջ 568), «հրաշունչ Մամիկոնեան» (Հ. էջ 382), «հրաշունչ Ռազմիկ»,⁶ «շանթանման հերոսներ» (Հ. էջ 146), «շանթընկեց բազուկ» (Հ. էջ 489), «շանթող զօրավար» (Հ. էջ 383), «փոթորկաշունչ այրուծի» (Հ. էջ 380):

գ. Խօսք: Գ. Նժդեհը բազմաթիւ առիթներով արծարծել է խօսքի վճռական նշանակութիւնը եւ նրա ներգործութիւնը զանգուածների վրայ՝ համարելով գենքից աւելի ուժեղ միջոց՝ բոցավառելու հայրենասիրութիւն, ապա եւ ռազմադաշտերում յաղթական դուրս գալու համոզւածութիւն: Ներակայացուող մակդիրաւոր բառակապակցութիւնները բնութագրում են խօսքը իր թէ՛ բացասական, թէ՛ դրական դրսեւորումներով. «աղտեղաբան թռուցիկ» (Հ. էջ 211), «թղթե կարգադրութիւն»⁷, «խայթող թերթ» (Հ. էջ 33), «հայհոյանքներով խնկւած յօրուած» (Հ. էջ 104), «մահաշունչ կեղծիք» (Հ. էջ 86), «մեռեալ շեշտ» (Հ. էջ 460), «ուռուցիկ խօսքեր» (Հ. էջ 30)... Բայց նաեւ. «աստուածաշունչ խօսք» (Հ. էջ 413), «աստուածաշունչ մունետիկ» (Հ. էջ 593), «մարգարէաշունչ Քրիստափորներ» (Հ. էջ 171-172), «երկաթ խօսք» (ԳԵ. էջ 20), «խաչուած խօսք» (ԳԵ. էջ 23), «հրեղէն խօսք» (Հ. էջ 470), «հրաբերան պերճախօս» (Հ. էջ 107), «հրեղէն պատգամ» (Հ. էջ 413), «ոսկէ խօսքեր» (Հ. էջ 96), «տաք խօսք»⁸, «ցեղաշունչ խօսք» (Հ. էջ 148):

5* Հասարակ գոյականների մեծատառով գրութիւնը Գ. Նժդեհինն է:

6 Գ. Նժդեհ, Նորահայտ նամակներ, Հայաստանի արխիվային գործի հրատ., Երեւան, 2012, էջ 24:

7 Կատական գործ թթ. 321-339:

8 ՀՀ ՊԱ, ֆ. 198, Ֆ. 1, Գ. 73, թթ. 19-20:

դ. Մարդ: Ինչպիսի՞ն է մարդը՝ իր ֆիզիկական, հոգեկան, բարոյական առումներով: Նա է կրողը հայրենասիրության կամ հակահայրենասիրության (հեղինակի բնորոշմամբ՝ *գինետնային հայրենասիրության*), *կարճաշունչ հայրենասիրության*: Նա է վախկոտօրեն տեղի տալիս կամ գրեթե առանց զենքի՝ սրբազան զգացումներով օժտուած, յաղթում թշնամուն: Նրանն է թե՛ տգեղատգեղ, անբովանդակ, թե՛ ոգեշունչ իմաստասիր խօսքը: Այս ամենին Գ. Նժդեհը յաճախ է անդրադարձել՝ վերլուծելով կերպարներ եւ մարդկային ներաշխարհը: Ներքոյիշեալ մակդիրային կապակցութիւնները վերաբերում են մարդու ֆիզիկականին, յաջորդ՝ ե. կետի շարքը՝ հոգեկանին. «աղամանդ գեղեցկութիւն» (ԳԲԵ. էջ 119), «աղամանդ ճակատ» (Հ. էջ 180), «բարտի հասակ» (ԳԲԵ. էջ 121), «Արարատեան արեւով օծուն ճակատ» (Հ. էջ 151), «բոց շրթներ» (ԳԲԵ. էջ 120), «լուսափայլ ժպիտ» (Հ. էջ 412), «կայծկլտուն նայուածք» (ԳԲԵ. էջ 127), «կարօտավառ հայեացք» (Հ. էջ 326), «վիուկատիպ կանայք» (Հ. էջ 210):

ե. Հոգեկան աշխարհ: Բնութագրում է մարդու ներաշխարհը, նրա բացասական ու դրական յատկութիւնները. «անյատակ տգիտութիւն» (Հ. էջ 115), «գաղջ վերաբերմունք» (Հ. էջ 581), «ժանգոտ մտածում» (Հ. էջ 102), «բնաեղծուած սրիկայ» (Հ. էջ 194), «հիւանդոտ փառասիրութիւն» (Հ. էջ 23), «խորշակահար հոգի» (Հ. էջ 135), «հողմավար հոգի» (ԳԲԵ., էջ 102), «հոգեպէս քանդուած էակ» (էջ 197), «շպարուած թուլութիւն» (Հ. էջ 138), «ցեխոտ (Նժդեհի դէմ) արշաւանք»⁹ ... Բայց նաեւ. «ալեւոր իմաստութիւն» (Հ. էջ 498), «աստուածային արհամարհանք» (Հ. էջ 333), «արեւոտ սէր» (Հ. էջ 418), «բիրեղ նկարագիր» (Հ. էջ 597), «բոցավառ զգացում»¹⁰, «գրանիտէ հաւատ» (Հ. էջ 90), «կարմիր վրեժ», (ԳԵ. էջ 10) «հաւերժաշունչ ոգի» (Հ. էջ 35), «հրեղէն կարօտ» (Հ. էջ 174), «նուշ յուշ» (ԳԲԵ. էջ 97), «ոսկի երազ» (Հ. էջ 24), «վարդագոյն լաւատեսութիւն» (Հ. էջ 22), «տաք կարեկցութիւն» (Հ. էջ 410)...

զ. Բնութիւն: Եւ, վերջապէս՝ աշխարհը, միջավայրը, որի մէջ ապրել են եւ ապրում են մարդկային սերունդները: Ըստ նկարագրուող իրավիճակի, բնութիւնը դառնում է վշտայար ու վշտացնող. «անապատ կուրծք» (բնութեան) (ԳԵ. էջ 22), «լալկան առուակ» (Հ. էջ 413), «վայոդ քամի» (Հ. էջ 413), «տխուր վերջալոյս» (Հ. էջ 413) ... Բայց, ընդհանրապէս, մանավանդ հայրենի բնութիւնը, գեղեցիկ է ու քնարաշունչ. «աստուածազարդ բնութիւն» (Հ. էջ 150), «արեւի հետ համբուրուող լեռ» (Հ. էջ 359), «արծուանիստ գահ» (Հ. էջ 413), «թաւեայ գեփիւտ» (ԳԵ. էջ 45), «լալկան գեփիւտ» (ԳԵ. էջ 45), «կապուտաչուի շուշան» (Հ. էջ 376), «հեզ գեփիւտ» (ԳԵ. էջ 45), «ոսկեշող ցուքեր» (Հ.

⁹ ՀՅԴ ԿԱ, դատական գործ, թթ. 88-90:

¹⁰ Գ. Նժդեհ, Լեռնահայաստանի գոյամարտը, «Հայրենիք» ամսագիր, թիվ 11, 1923 թ.: Մոյն ամսագրի վերաբերեալ յետոյ յղումները կտրուեն շարադրանքում Լ.Գ. տեսքով:

էջ 415), «քնաթաթախ դաշտ» (ԳԵ. էջ 34), «քնաթաթախ ծաղիկներ» (ԳԵ. էջ 62), «անխօս ոսկեշող աստղեր» (Հ. էջ 413)...

Մակդիրային ծաղկաքաղ: Գարեգին Նժդեհի ստեղծագործություններից բառաքաղել ենք աելի քան 150 բանաստեղծական մակդիր: Դրանցից 40-ը՝ չափածոյ եւ արձակ բանաստեղծություններից, ըստ որում, գրեթէ կէսը «Դաշնակցութեան պանթէոնը» շարքից: Մնացած աելի քան 110-ը քաղուած են գիտական ու հրապարակախօսական աշխատություններից, նամակներից, կոչերից: Շատ մակդիրակիրներ միանգամից կարող են ունենալ երկու, եռ-նիսկ երեք մակդիր: *Զեփիւն եւ նայուածք* գոյականներն ունեն երեքական մակդիր. առաջինը՝ *լալկան, հեզ, թաւշեայ*, երկրորդը՝ *խածնող, հոգի հատցնող, կայծկլտուն*: Լինում են քնարական խտացումներով նախադասություններ, ինչպիսին է յետեւեալ մէջբերումը, ուր առկայ են երեք մակդիր եւ փոխաբերություններ. «Նա սիրում էր մորմոքը **լալկան առուակի ու հառաչը հեծկլտող ու վայող քամիների...**» (Հ. էջ 413):

Մենք կատարել ենք 40-ի չափ մակդիրների մի ծաղկաքաղ, որն այբբենական կարգով ներկայացնում ենք ստորեւ: Դրանցից իւրաքանչիւրը մի-մի գեղագիտական գիւտ է, իսկ նրանց ամբողջությունը ասես երաժշտական, քնարական մի ստեղծագործություն, եւ վկայում են հեղինակի արտասովոր բանաստեղծական մտածողութեան մասին:

* * *

Աղամանդ գեղեցկություն. «Ո՛վ կը կոտրէ սիրոյ գրիչն գեղեցկութեան աղամանդ» (ԳՐԵ. էջ 119):

Աղամանդ ճակատ. «Առաքեալի սիրտ, իմաստասերի գլուխ, աղամանդ ճակատ – ահա՛ կատարեալ առաջնորդը» (Հ. էջ 180):

Ալետոր իմաստություն. ««Ինչ որ Աստուածն է, այն էլ իր երկրպագողներն են», – ասել է Արեւելքի ալետոր իմաստությունը»: (Հ. էջ 498):

Աղտեղաբան թռուցիկ. «...Ազգայնական հայությունը յղացավ վատության մի միւզէի գաղափարը, ուր պիտի հաւաքէր ... աղտեղաբան թռուցիկներ, անստորագիր նամակներ ...» (Հ. էջ 211):

Անապատ կուրծք. «Մեռնող բնութեան անապատ կրծքին Անվերջ, յուսահատ աշունն է լալիս» (ԳԵ. էջ 22):

Անյատակ տգիտություն. «...Ես ծիծաղում եմ նրա (թրքության) անյատակ տգիտության վրայ... Պիտի կարողանա՞ս սպանել հայ ժողովրդի պատմական յիշողությունը» (Հ. էջ 115):

Աստուածազարդ բնություն. «Իր (Ահարոնեանի) խօսքը Հայաստանի աստուածազարդ բնութեան թախծությունն ունի» (Հ. էջ 150):

Աստուածաշունչ խօսք. «Այսպէս է պատգամում իմ մարգարէն իր աստուածաշունչ խօսքը» (ԳՐԵ. էջ 76):

Աստուածաշունչ նահատակ. «...հայիոյեցին յաճախ յեղափոխութեանը եւ խզրգեցին նրա աստուածաշունչ նահատակներին» (Հ. էջ 78):

Աստուածաշունչ քնար. «Նա (Եսփորովը) մեզ իր աստուածաշունչ քնարը տրամադրեց, քանզի երգիչ էր» (Հ. էջ 591):

Արեւի հետ համբուրուող լեռ. «Հոգու համար ... արեւի հետ ամեն օր առաջինը համբուրուող լեռը՝ հողեղէն կարկառ, բարձունք չէ՞ միայն... » (Հ. էջ 359):

Բոցավառ զգացում. «Կռիւր նրա (սյունեցու) համար ... մի արնոտ դրամա, որի մէջ առաջին դերերը կատարում են բոցավառ զգացումը եւ յաղթական մահը» (ԼԳ.): Բոցեղէն հայրենաբաղձութիւն. «Բոցեղէն հայրենաբաղձութիւնը ... հայրենագուրկ Հրէան հրէայ պահեց...» (Հ. էջ 468):

Գաղջ վերաբերմունք. «Հայ հասարակագիտակ մտքի աղքատութեամբ պիտի բացատրել հին սերունդի գաղջ վերաբերմունքը՝ դէպի նորը» (Հ. էջ 581):

Գայլ ցեղ. «...Այլապէս քոյ ժողովուրդը իր տեղն արեւի տակ աստիճանաբար պիտի զիջի իրեն շրջապատող ... գայլ ցեղերին ...» (Հ. էջ 78):

Գեղատխուր հողաթումբ. «Նա, անցորդ, այս գեղատխուր հողաթմբի տակ հող դարձած պատանին...» (Հ. էջ 413):

Գիշատիչ կառավարութիւն. «Խրիմյանը...Հայ Եկեղեցու նյութական հարստութիւնը փրկելու համար ռուս գիշատիչ կառավարութեան դէմ մաքառեց» (Հ. էջ 213):

Գորտի հոգով. «Գորտի հոգով առօրեապաշտ պաղ մահկանացուն ...» (Հ. էջ 576):

Գրանիտէ համոզում . «Դա Գանդին է, ... որը գրանիտէ համոզում ունի» (Հ. էջ 180):

Գուժկան բու. «Լուռ մտիկ տուէք մոխրակոյտերուն՝ կարմիրով ներկած: Լսեցէ՛ք ողբերգն բուերու գուժկան ...» (ԳՐԵ. էջ 115):

Դիցազնաշունչ ցեղականչ. «Հայ ստամտաւորականը ... Իգուր անցան Ալիշանի ու Րաֆֆիի, Ահարոնեանի ու Վարուժանի եւ այլոց դիցազնաշունչ ցեղականչերը ...» (Հ. էջ 533):

Զրահապատ թաթ. «Մուդրոսի հաշտութեան պայմանագրի ոյժով յաղթականները ազատ էին իրենց զրահապատ թաթը դնել թուրքական երկրի ամէն մի կէտի վրայ» (Հ. էջ 267):

Թեւատ ունայնութիւն. «Անցեղաշունչ է, որով ... թեւատ ու առօրեական ունայնութիւններից ... բարձրանալու անգոր» (Հ. էջ 532):

Թղթ բարեմակութիւն. «... հենց որ մի ուրիշի թղթ բարեկամութիւնը իրենց աւելի շահավէտ թւաց, նրանք ... լքում են իրենց նախկին զինակիցներին» (Հ. էջ 56):

Թղթ կարգադրութիւն. «Զբաղուած էին ... հանգամանքներին անհա-

րիք նախագծեր մշակելու վրայ՝ ես բոլոր այդ ձեռի թղթե կարգադրություններն անուշադրության էի մատնում...»¹¹:

Լալկան գեփիւռ. «Իմ սէրը՝ դա շունչն է հեզ ու թաւշեայ, լալկան գեփիւռի» (ԳԵ. էջ 45):

Լուսեղէն այբուրեն. «... Լուսեղէն այբուրեն – մեզ տուել է Տարօնը» (Հ. էջ 525):

Խաճնող նայուածք. «Ու նայուածքներդ, ախ այդ խաճնող, հոգի հատցնող կայծկլտուն նայուածքներդ...» (ԳՐԵ. էջ 127):

Խորշակահար հոգի. «Խօսէք հետները...եւ պիտի հասկանաք սրանց խորշակահար հոգին, որ մատնում են իրենց ամեն մի խօսքի ու շարժումների մէջ» (Հ. էջ 135):

Ծիածանային անուրջներ. «Փշրեցի՛ն Տէր, վատ արարածները մեկիկ-մեկիկ ծիածանային անուրջներս...» (ԳԵ. էջ 44):

Կապուտաչուի շուշան. «Կ՛անցնեն օրեր... եւ նա կապուտաչուի շուշանները կը վերածի աղբի» (Հ. էջ 376):

Կիսագոյն կազմակերպություն. «... կազմում են թխովի հեռագրեր ... կիսագոյն կամ բոլորովին անգոյն կազմակերպությունների անունից եւ ուղարկում Մոսկուա...» (Հ. էջ 206):

Հայաստանասպան քաղաքականություն. «Իբր ցեղօրէն ընկած տիպ՝ նա ուզում է Քրիստոսն անգամ դարձնել բոլշեիկեան գործակալ եւ լծել կոմունիստների հայաստանասպան քաղաքականութեան» (Հ. էջ 216):

Հեծկլտող ու վայող քամի. «Նա սիրում էր ... հառաչը հեծկլտող ու վայող քամիների ...» (Հ. էջ 413):

Հոգեպէս քանդուած էակ. «Նա իբր հոգեպէս քանդուած էակ՝ նաեւ պատրասպաշտ է» (Հ. էջ 197):

Հրաբերան պերճախօս. «Դու դառնում ես հրաբերան պերճախօսը» (Հ., էջ 107):

Հրատանջ ազգ. «...բանտարկեալները...ուզեցին Ազատութիւն եւ Արդարութիւն գողանալ իրենց հրատանջ Ազգի համար...» (Հ. էջ 435):

Ճշմարտութեամբ օծուն գրիչներ. «...տեսնել ու հասկանալ կը սկսին ... շարժուիլ կը սկսին ճշմարտութեամբ օծուն գրիչներ» (Հ. էջ 88):

Մահաշունչ կեղծիք. «Մահաշունչ կեղծիքէն խորշակահար լինում ... խեղդում ես շրջապատիդ մահաշունչ կեղծիքի մէջ» (Հ. էջ 86):

Յորանջող տգիտություն. «...այդ տողերի իմաստը պէտք է բացատրել ռամկավարների յորանջող տգիտութեամբ, այլ հոգեբանութեամբ» (Հ. էջ 190):

Ոսկեգրիչ մտաւորական. «Ոսկեքսակ հայր չկանգնեց ոսկեգրիչ մտաւորականի թիկունքում» (Հ. էջ 468):

11 ՀՅԴ Գերագոյն ատեան, Դատական գործ, թթ. 321-339:

Պերճուհի շամանդաղ. «Շղթաներդ ոսկեցնցուղ, ո՛վ պերճուհի շամանդաղ ...» (ԳՐԵ. էջ 119):

Տաք խօսք. «...պէտք է ժողովրդին կենդանի գործ ցոյց տալ, տաք խօսքի հետեւանքն ապացուցել»¹²:

Յեխոտ արշաւանք. «Այսօր շատերը ... պարսկական չարչի խանաներից տմարդաբար ցեխոտ արշաւանք են սկսել իմ եւ Լեռնահայաստանի հերոս ժողովրդի հասցէին»¹³:

Ուռուցիկ խօսքեր. «...յաճախ փորձում է իր հոգու այլանդակութիւնները քողարկել այս կամ այն ուռուցիկ եւ գեղեցիկ խօսքերով» (Հ. էջ 30):

Փայտէ ժողովուրդ. «...սրանց համար... հայութիւնը փայտէ ժողովուրդ է, անընդունակ նոյնիսկ զգալու եւ երազելու լաւ օրերի մասին» (Հ. էջ 82):

Քնաթաթախ ծաղիկներ. «Գիշեր էր: Մարմանդ հովերը քնքշօրէն սիրաբանում էին քնաթաթախ ծաղիկների հետ» (ԳԵ. էջ 62):

¹² ՀՀ ՊԱ. Ֆ. 198, Յ. 1, Գ. 73, թթ. 19-20:

¹³ ՀՅԴ ԿԱ, Դատական գործ, թթ. 88-90: